



Inatsisartut suleriaasiat §33 naapertorlugu aallajangiiffigisassatut imaattoq saqqummiuppara:

UPA 2018-imi saqqummiunneqartussamik utoqqalinersiallit siusinaartumillu sulisinnaajunnaarnersiutillit saniatigut sulisarnerminni pisartakkaminnik ilanngaaffigitarrunnaarnissaata kinguneqaataanik Naalackersuisut misissuinissamik peqquneqarnissaat pillugu Inatsisartut aalajangiiffissaattut siunnersuut.

(Inatsisartunut ilaasortat Villy Olsvig, Inuit Ataqatigiit)

Tungavilersuut:

Nunatsinni sulisinnaasut tamaasa pisariaqartippagut. Killilimmilluunniit utoqqaat allallu siusinaartumik sulinnaajunnaarnersiutillit aamma inuiaqatigiinni napatitseqataasinnaappata tikilluaqquagut kaammattussallugillu.

Inuk sulisinnaasoq sulissammat, nukissaqarlunilu piumassuseqarpat killilersussanngilarput utoqqalinersiutaanik arsaartulissallugu. Inummi ukiorparujussuit sulisimalluni inuiaqatigiinnilu kivitseqataasimasooq toqqissisimalluni amigaateqaranilu inuussammat utoqqalinersiassaani arsaassagutsigu sulinerup isumaa, nalingalu innarlissagatsigu.

Inuiaqatigiinni sulisinnaasut suliffissallillu periarfissaannik arsaartornagit periarissittariaqarpagut. Inummut taassumunga ulluinnarni inuuniarnermini iluaqutigissavaa anersaakkut aamma pigissaarnerunikkut. Inuiaqatigiit iluaqutigissavaat assaat pisinnaasut annerusumik atorluarutsigit, angerlarsimaannaratik sulerusullutillu piumassuseqarpata, pisinnaasartik naapertorlugu saniatigut sulissagunik.

Ilanngullugu aamma eqqaaneqartariaqarpoq utoqqalinersiallit siusinaartumillu sulisinnaajunnaarnersiutillit pisinnaatillutik saniatigut sulisarnerminni qaavatigut boligsikringimik ilanngaaffigineqartarmata.

Utoqqalinerme siusinaartumillu soraarnerussutisiallit saniatigut isertitaqartartut ilanngaavigineqartarrunnaarnissaasa kinguneqaataanik Naalackersuisut misissuinissaat pillugu siunnersuummik saqqummiussivugut. Soraarnerussutisianimmi pisartagaqartortavut aamma nunatsinni akileraartartunut ilaapput, taamaalillutillu inuiaqatigiinnik napatitseqataallutik. Soraarnerussutisiaqartut sulinerikkut inuiaqatigiinni naleqarnerulersitsisinnaagunik taava tamaanna periarfissaqartariaqarpoq. Misissuinermissaaq isumaginninnermi inatsisinut allanut tamatuma saniatigut isertitaqarnerup kinguneranik utoqqalinerme siusinaartumillu soraarnerussutisianik ilanngaasarunnaarnikkut sunniutissai aamma qulaajaavigineqassapput.

Pisortanut aningaasatigut allaffissornikkullu kingunerisassat

Misissuineq AC Fuldmægtigip ukiup affaani sulineranik annertussuseqartussatut ilimagineqarpoq, tamannalu nutserineq ilanngullugu 250.000 kr-inik naleqassaaq.

Namminersorluni inuussutissarsiateqarnermut aningaasatigut allaffissornikkullu Kingunerisassat

Pilersaarusionerup ingerlanneqarnera namminersorlutik inuussutissarsiortunut aningaasatigut kinguneqaateqassanngilaq.

Innuttaasunut aningaasatigut allaffissornikkullu kingunerisassat

Pilersaarusionerup ingerlanneqarnera innuttaasunut aningaasatigut kinguneqaateqassanngilaq.